



Las scolas medias privatas, sco la scola claustrala a Mustér, battan per lur existenza. MAD

Scolas medias tema tar il program annual 2017

■ **(anr/fa) Il program annual cuntegna las finamiras che la regenza ha formulà per proxim onn per ils differents secturs. L'expertisa giuridica davart las scolas medias grischunas ha dà da discurrer.** *Maurizio Michael* (pld, Bergiaglia) che presidiescha la cumission per politica statala e strategia ha preschentà il program statal 2017: «Quest program è la concretisaziun da las finamiras da la regenza, da las qualas nus avain prendì enconuschientscha durant la sessiun da favrer da quest onn.» Il parlament ha decis unanimamain da tractar da maniera detagliada il program annual. Da discurrer ha dà la finamira d'elavurar in concept per examinar las structures da las nov scolas medias en Grischun. Per far quai prevesa la regenza da laschar far in'expertisa giuridica. *Margrit Darms* (pcd, Glion), *Luca Tenchio* (pcd, Cuir), *Heinrich Berther* (pcd, Mustér), *Duosch Fadri Felix* (pld, Suot Tasna) e *Gabriella Tomaschett* (pcd, Mustér) han express lur dubis davart la necessitad da questa expertisa giuridica. Els han punctuà l'impurtanza da las scolas medias privatas per l'economia en las singulas vals.

Cusseglie governativ *Martin Jäger* ha respus che la regenza spetgia uss sco emprim ils rapports da las scolas medias grischunas. «Avant che trair decisiuns èsi da far l'analisi dal status quo», ha ditg Jäger, «igl è da procurar ch'ils giuvenils che fan la matura en Grischun sajan tuts bain preparads per far ils studis.» Il cusseglie governativ ha accentuà ch'ina analisi premurusa saja neccessaria per preparar da maniera seriosa la revisiun totala da la lescha davart las scolas medias grischunas. La finamira da rinforzar la segirezza publica e cumbatter l'uschenumnà turissem criminal e dumagnar la migraziun prevesa la regenza da realisar cun procurar per ina collavuraziun intensiva da la polizia cun il corp da guardias da cunfin. *Rico Lamprecht* (pbd, Val Müstair) ha menziunà ch'il corp da las guardias da cunfin a Müstair, Campocologno e Castasegna saja vegnì redimensiunà ils ultims onns considerablamain. El ha appellà a la regenza da s'engaschar a Berna ch'ins chalia da diminuir al cunfin grischun il dumber da guardias da cunfin. Il cusseglie grond ha prendì enconuschientscha dal program annual 2017.